

Kórósía

Ebeq sáhnsahwe ahtebé ehwehne.

Kórósía suwahpeqme Esia marákórápéq kowe. Mó kegá Kórósía suwahpeqte ké Sísá éhweh teriuwara mibeqté kégá Sísansabé aiq pútare atówe. Anehe mó kegá péhe éhwéh síwáhnoruwana Poraga mina irena mah pahsíépéq ahqáho aritena aiq pútaq ehwéh síwáhnorúwe. Wega mahraue síwáhnoréna, Sísá Karáhéga moke kéh náneq mirarena webataq ite kaweraitena ite kiotaiki Wahnáh mía míaire. Minayabe wene aiq pútaq sansá ambubu atawéq tábúsoqme sehgióro éna Poraga mah pahsí sehiranúwe.

Poraga Kórósía suwahpeqte ké siu pahsíe.

1 ¹Kórósía suwahpeqte kéó, íné Porane páhsi sáhnsahwe tagahro. Sísá Karáhé éhweh kosíwáhnorinkeheéna Manikánka omaq intena eqmaq núwátáire. Ínéreq Tímótireqka Sísá Karáhéne arambehriúya aníté úye. ²Itewe Sísá Karáhéne sansá kawerue ambubu atíáhwe. Maniká Iteriboga ite séhréh aitena iru ukiq itankéhe.

Kórósía kegá Sísansabé aiq pútare atera kéro ehwehne.

³Maniká we Sísá Karáhé itene Wahnahne abowáe. Itensabé púreraityataq Manikánsabe kaweróne ateta ahriahri iwíáh iwíáh atoye. ⁴Sísá Karáhéne sansá aiq kawerue ahtebéq tábúsoqme sehgieq ómi Manikáne animárínsabé irutaboiorowe. Minayabe ireta itensabé púreraityataq Manikánsabe kaweróne ateta ahriahri iwíáh iwíáh atoye.

⁵Aiq pútaq ehwéhmé kaweq ehwéh téh írótaq íópeq oga mérapeq awaq mianeheqmúne iwíáhéq irutaboiorowe. Irutaboionsabé itega Sísane sánsá miraéq we tagaríáh keyábé irutaboiorowe. ⁶Manikánka séhréh aitahráhi ehwéh írátótaq aiq pútare atera ahtebarowe. Minayabe mi tanáhráq Manikánka kaweraitáráire. Sísá tagaríáh kégá mah kehiná kéhíná mah kawéq éhwéh teri terinowana Manikánka íráh ké moq kawerarítéhre.

⁷Mi kawéq ehwéhmé ite Kórósía ke íwáhnorurai anímé Épárásí Sísá Karáhéne arambehri aní ména itereq arambehrire. Arambehriraq wensabé irutaboirúne. Iteba íre pokorahúyansabé Épárásiga Sísá

Karáhéne sansá kawerue íwáhnoruraire. ⁸Wega teiena, Manikáne Awanka séhréh aitarái puaq itega mó keyábé áhnte irútábóírowe uraire.

⁹Wega teiátáitaqkákák menahnkákák amahnágaákák itensabé púreraitaráúye. Ite íre túbáh agia peh ahriahri púreraitaráúye. Manikáne Awanka awahbeh iwíáh wene sánsá iahtebageheéta púreraitoye. ¹⁰Manikáne Awanka miráinaraq ite ahtebia ké tábúsoqme íráh ké míagehe. Minayabe wega mirainkeheéta itensabé púreraitoye. Iahtebharaq Maniká awahbeh sansá miraéq kaweqtaq mía míorahowe. Itega áhnte kawéq árámbehrí miraorahéq Maniká tábúsoqme tagariagehe.

¹¹Íre kaweq sunúq sínaraq ite uaresa ánímárí tabasíwe míageheéna Maniká págege aní púana wega ite págege aitéhre. Wega ite séhréh aitena págege aitankeheéta itensabé púreraitoye. ¹²Ite págege ánímárí méq itene irupipeq eyoyóue Maniká Iteribonsabé kaweróne atáhro. Manikánka wahnahnirabeq téhrehabeqme áhnte kawéq náneq kéhre. Mókake ite wene animárí mibeq méq mi kawéq náneq meyageheéna Manikánka aiq kaweraitáráire.

¹³Sunkíkírirabeq owainawanka saiqnariarairabeqte Manikánka ite meiqmena wene arunáwí áhnínkáwágá wahnahnirabeq móítáráire. ¹⁴Sísaga miraúnsabe Manikánka itene ahbabáq kaqiuwena insahwé aitéhre.

Poraga Sísa Karáhé éhweh pahqsuo ehwéhne.

¹⁵Wehukega Maniká íre tagahrahúne. Sísa Karáhéwé Maniká tahnsa aní míehre. Téhwe Sísa Karáhé ména moke miraro naneqmarí kiotaikéna wahnahnire. ¹⁶Wega moke íopeqté náneqkákák mah marákóipéqté náneqmarínkákák mirarowe. Moke ábóraq kéh náneqmarínkákák kopípéq kéh náneqmarínkákák mirarowe. Wega moke íopeqté kéné wahnahmarínkákák moke anotah wahnáh ánímárinákákák moke págege naneqkákák omaq sitowe. Wenahninká moke kéh náneqmarínkákák wahnahninkeheéna Manikánka, Miraúno atowana mirarowe.

¹⁷Moke miraro naneqmarínkákák íre kotaq Sísa Karáhé míowe. We íre míéhtáq tahirímé moke kéh náneqmarínkákák apubúue taqnobagi irino. ¹⁸Sísa tagariona ke moráénue wene anonka tahnsá miónana wega wahnahnaitena itene iyahqno tahnsa míehre. Sísa Karáhé mía míainsabé moke ite we tagariona ke oga mía míorahúne. Sísa pukéna we ebeq oganúkú púaq anehe ite moq oganúkoneheqmúne. Oganúkúnsabe moke ite kiotaqme ména wahnah wahnahnire.

¹⁹Manikánka iwíáhúnka abowá mía míainserah wenahni moq mía míaire. ²⁰Wenahninká miraúnsabe Manikánka, Íné moke kéh náneqkákák kaweraritanauge íwíáhúwe. Sísa awankátaq táhpague pukútaq wene korahq tunsabe Manikánka itene iru ukiq itéhre. Iru

ukiq itena moke mah marákóipéqté náneqkakáq íópeqté náneqkakáq kaweraraníe íwíáhúwe.

²¹Menah ite Manikáne naruo anímárí méq wensabé iuwahriehre íwíáhéq ahababáq iwiáhue ahababáq aruqaruruowe. ²²Sísaga itene ahababáqsabe awankátaq pukúnsabe Manikánka amahnága ite insahwé aitáráire. Wega ite íre ehweh aitanieéna insahwé aitáráire. Ite íre ahababária peh weba kaweqtaq mía míageheéna insahwé aitáráire.

²³Sísane kaweq ehwéh teri terininkeheéna íné Pora eqmaq núwátáire. Mah kawéq éhwéhmé mah kehiná kéhíná teri terinúne. Mah ehwéhmé ambubu atawéq sehgióro. Kaweq nahnká íre míu míuia peh págegeue kagainserah mó ehwéhsábé itene irupipeq iwiáh kikiriyehboq Sísaga éhweh ambubu atíáhro. Mah kawéq éhwéh írátótaq itega, Oga mía míaonehe íwíáhowe.

Poraga Kórósia ke séhréh arito ehwehne.

²⁴Ite séhréh aitáráunsabé níwíoqnahwe. Minayabe nirupipeq íre umehia peh eyoyóire. Sísaga tagaríáh ké áhnte úkéq kaweqtaq míageheéna arambehriunsabé níwíoqnahwe. Ite Sísaga tagariona ke moráénéq wene anonka tahnsá mífone. Wene anonka tahnsá mionayabé wehukega níwíoqnahtaq Sísaga Karáhé moq áwíoqnahwe. ²⁵Ite kaweqtaq míageheéna Manikánka, Sísaga tagaríáh ké séhréh arito aintáráire. Aintáráirana arambehriéna Manikáne ehweh moke pahsuqme teri terinuge.

²⁶Naho naho Manikánka wene epéqté éhwéh íre teriasa peh amahnága wene animárí teíre. ²⁷We awahbeh sansánéna naho íre teriasa éhwéh amahnága ite nahnso kereq itereq teíre. Mi epéqté éhwéhmé mahraréna, Sísaga Karáhé itene irupipeq míéhra moke Manikánka wahnahnirabeq áhnte kawéq náneq kéhrabeq seneherawoe ire. Mi ehwéhmé anotah kawéq éhwéhnká ite ómi kehiná séhréh aitahráhi ehwéhne.

²⁸Moke mah kehiná kéhínánká irageheéna we éhweh ómi teri terinuge. Ómi íráh kéga Sísaga Karáhéne sansá ahtebéra kawerue miraigeheéna tábúsoqme síwáhnoréna kawerue miraoro éna pagu pagunuge. ²⁹Ínéga kawerue mirainkeheéna Manikánka anotahtaq págege aintéhre. Págege aintéhnká áhntetaq arambehri aruqaruruge.

Manikánsabe aiq pútare ateq péhe éhwéh saiqnaruanéhe i ehwéhne

2 ¹Itereq Áráórísia suwahpeqte kéreq mó Sísaga tagaríáh kéreqka néne niuranabiahtapeq íre tagarowe. Itega Sísane sánsá ahtebéq kawerue miraigeheéna áhntetaq arambehriuge. Minawé íráhro. ²Manikánka itene irupipeq kaweq iwiáh aitankeheéna arambehriuge. Mó kereq iteitereqsabé wensabé wensabé irutaboorigeheéna ite aiq pútaq ehwéh kawerue ahtebageheéna arambehriuge. Manikánka naho íre teiasa peh amahnága teí éhwéhmé Sísaga Karáhé éhwehne. Minayabeákáq Sísaga miraorahi sansánkákáqsábé ahtebageheéna teiúge.

³Késiipéq kaweq mensáméhnsá kopípéq kéhnserah Manikáne ahtebia sánsámé Sísaba kéhre. ⁴Mó kegá péhe éhwéh kawerue teiraq aiq pútare aritéhoéna teiúge. ⁵Ínéga iteba íre mía míaugana peh néne iwíáh iteba kagaire. Sísá Karáhéne sansá ambubu atawéq moráráq kawerue miraonsabé irena nirupipeq eyoyóire.

Sísareq mía míaeq oga mérapeq awaqme ehwehne.

⁶Itega Sísá Karáhénsabe aiq pútare ateq we itene Wahnah mía míai puaq we kéraneheqmúne íwíáhurowe. Itega mira íwíáhuronserahnoro. Ahriahri wereq mía míaoro. ⁷Íwáhnoruro sansá kawerue iahtebahro. Anotah awánkánká áhnte anúq kéna págegeue kagainserah itega Sísá kawerue tagariagehboq weba mía míaoro. Págege marákóráq piéhra nahnká íre míu míuia peh kaweqtaq kagainserah mi sansá ambubu atawéq mira aruqaruroro. Mira aruqarurirataq Manikánsabe iwíáh íwíáho.

⁸Péhe éhwéhnsábé aiq pútare aritéhboq kawerue iwíáhue tagaríáhro. Íre Sísá Karáhéne sansá peh wehukene iwíáh ehwehmé, abehq éhwéhmé, itene igaqnaréhne sansánsábé éhwéhmé, owainawamaríné sánsánsábé éhwéhmé teírataq mi ehwéhnsábé aiq pútare aritého.

⁹Sísá Karáhéwé wehukení úkéna Maniká Wenabo tahnsanéna abowágá inserah moke miraorahire. ¹⁰Ite wereq mía míauína puaq kaweqtaq míahrahéq oga mía míauíne. Wega moke mó wahnáhmári kiotaíqme wahnahnire.

¹¹Itega Sísá tagaríáh púaq Manikáne aiq pútaq sansá miraorahowe. Íre itene inonka amurúruyabe peh itene irupipeqté áhbábáqkákákq abehq íwíáhákákq sueq kaweq sansá miraorahowe. ¹²Ite Sísaba mía míaeq wání merowe. Itega weba mía míaonsabé sega Sísá maisatotaq ite moq maisatowe. Manikánka Sísá iriwe oganúq atonsabe aiq pútare atárónsabé Manikánka ite moq iriwe oganúq ítáráire.

¹³Manikáne ehweh íre írátótaq ahababáqka ite saiqnariaraire. Saiqnariarairaq peh ahababáq aruqarururonsabé ite pusa ké tahnsa míarowe. Ite Sísaba mía míauínayabé Manikánka itene ahababáqsabe moke insahwé aitená oganúq ítáráire.

¹⁴Wega sehgióro ú sansa itega íre sehgiráúnayabé itene ahababáq áhnte káráire. Manikánka mina sehgióro ú sansa Sísá pukú awánkátáq táhparó púana mi sansá parabarowe. ¹⁵Mitaq Manikánka moke owainawamarínseq sene wahnahmarínseq kiotaíqme ména se saiqnarowe. Saiqnéna anotah wahnáhn ánínká karábúsiipéq mórítéhra ke sabironserahnue sabirúwe. Sabirúwara we míorabeq se abehq náneq tahnsá úkuwara ómiga tagowe.

Itega Sísareq pukowanana sehgióro ú ehwehnká íre séhréh aitahráhire i ehwéhne.

¹⁶Minayabe itega táhutuahuqkákákq wánínkakaq íre awehrionsabé mó kegá ehweh aitého. Ábáhré tanahráqmé, ío seraríéh tánáhráqmé, ahrena

ahrena wehekáhmé sega miraoro ira sansá íre mirairataqmé ehweh aitého. ¹⁷Minawé peh mókake sína naneqsabé peh mánkánah tahnsá míre. Sísa Karahéwé aiq pútaq aní miéh púaq tagagehe.

¹⁸Mó kegá itensabé, Peh morá awehrio kewé íopeqté keyábé iwíáh iwíáh arítáh kéwé sensiwanka áhntetaq tagah kewé mó ke kiotaikowe teigéhe. Segá mi ehwéh aitéhansabé íre iwíáhoró. Mi ehwéhmé peh wehukéniné ehweh puaq íre aiq pútare arítáho. Mi ehwéh irare kegá seyega iwíáhéra ite ahtebia ké úne éra píribahriowe.

¹⁹Sewe Síssane sánsá íre ambubu atíahwe. Sísa tagariona kewé wene anonka tahnsá miónana wega wahnahnaitena itene iyahqno tahnsa miéhre. Itene inonka onkakaq onunkakaq kéh púana itene inonka págegeue kéhre. Minayabe Manikánka séhréh aitéhraq ite Sísa tagariona ke wene anonka tahnsá méq anonúkúne.

²⁰Sísa Karáhéga itene ahabáqsabe pukútaq owainawamarí kiotaikú púana sega ite saiqnaríórabeqte sabiiuowe. Minayabe itega mah marákóipéqté abehq sánsámé aneqsabé miraoo? Aneqsabé wehukega tei sánsámárí sehgiio? ²¹Peh wehukega itensabé, Mahna íre táhtoro. Mina íre nahro. Mó naneq pehragahro eme aneqsabé sene ehweh iraho?

²²Sega irare naneqme íre kagaorahi naneq puana parabaginawire. Minawé peh wehukega iwíáhue sehgióro e sansáne. ²³Mi ehwéh sehgió kégá, Kaweq sansáne iwíáhowe. Mi sansá sehgió kégá iwíáhéra, Mó sansámé kaweq iwíáh iwíáhé sansa míre. Mó sansámé uwaresa sánsá míre. Mó sansámárímé inonka kaweq wahnahnorahi sansámárí míre ewe. Mina pehragahro e ehwéhnkáwé, mah marákóipéqté abehq sánsámé íre séhréh aitena saiqnaruahrahire.

Sísareq moraráq irigowana ehwéhne.

3 ¹Ite Sísa Karáhéba mía míaconsabé Manikánka we iriwe oganúq atotaq ite moq iriwe oganúq itowe. Minayabe Sísa Karáhé míéhabeqte sánsánsábé irutaboíroro. We íopeq Manikáne ayah púpeq tútuue ména wahnah wahnahnire. ²Mah marákóipéqté sánsánsábé iwíáhéq irutaboíriyehboq peh Sísa míéhabeqte sánsánsábé iwíáh iwíáhue irutaboíroro.

³Sísa pukútaq ite moq wereq pukéq amahnága wereq Maniká Iteriboreq kopipéq moraráq míáhwe. Minayabe Sísa míéhabeqte sánsánsábé iwíáh iwíáhue irutaboíroro. ⁴Sísa Karáhéwé itene ogamé áwahe wíre. Wega kaweq tehreh naneqkakáká tuinagake itega moq wereq tuigéhe.

Ite o ke úkurauna ehwéhne.

⁵Minayabe itene irupipeqté áhbábárorahi iwíáh súáho. Mó aniné ahre ahrari weh mahbi abarié iwíáhwé, íre kaweq iwíáhwé, ahabábq

sansa sehgie iwíáhwé, mó aniné ménsámehnsánsabe aigará pabeki iwíáhwé súáhiro. Mó aniné ménsámehnsánsabe aigará pabekime, minawé péhepehe manikánsábé iwíáh iwíáh atáh sánsáne. ⁶Mina tahnsa ahbabáronsabé Manikánka anotah abíáhnsá aritena kamah arinawire. ⁷Menah iteitega mina tahnsa áhbábáq mira aruqaruruowe.

⁸Amahnágawé mina tahnsa áhbábáq sánsá moke súáhiro. Taonsahwé, abiahnsa atewé, mó aní ahbabáq atewé, mó anínsábé péhepehe ehwéh atewé, ehbome, mina tahnsa áhbábáq sánsá moke súáhiro. ⁹Itene irupipeqté áhbábáq iwíáhwé, ahbabáq sansamé airaiq súáhnsábé wensabé wensabé péhe éhwéh teawíiyeho. ¹⁰Itega o ke úkurowe. Manikánka ite kaweq iwíáh aitowaq itega we tahnsá kaweq ke mía míaiagehe.

¹¹Sísane sánsá mirao kewé peh morá ké tahnsane. Káríki kewé, Asiu kewé, síú amurúruáh kéwé, síú íre amurúruáh kéwé, mó ehwéhnikákák irare kewé, mó sansá mirao kewé, mó kené arambehhiraq saiqnaríáh kéwé, arambehhriyabé ápeq meyáh kéwé, moke mina tahnsa ké Sísane ehweh sehgiówe. Sísá Karáhéga moke mina tahnsa kéné sirupipeq mía míaire. Segá wereq mía míaconsabé sene sirupipeq mía míaire.

Moke mó keyábé irutaboiré sansa sehgióro i ehwéhne.

¹²Manikánka itensabé arutaboiréna wene kaweq anímári míageheéna omaq itaráire. Minayabe teínserah sansánue míáhiro. Mó keyábé irutaboirue séhréh arítáhiro. Ite iuwahbeh naneq iwíáh sueq mó keyábé síru ukisiteq uwaresa ánímári míáhiro.

¹³Mó kegá íre kaweraitéhrataqmé peh uwaresa ké míáhiro. Itene Wahnahnka itene ahbabáqsabe íre iwíáhue ahrreraq matíéhre. Mina inserah itebaqté ánínká are ahbabáratahnaq wene ahbabáqsabe íre iwíáhue ahrreraq matiahno. Mó keyábé irutaboiro sansánká moke mó kawéq sánsámári kiotaikire. ¹⁴Moke mó keyábé irutaboiroro. Mah sansánká moke mó sansá kiotaikéna moke mó sansá págege atena séhréh atéhre.

¹⁵Sísá Karáhéga itene iru ukiq itena peh morá iwíáh aitaráire. Minayabe ite iru ukiqme míáhiro. Iru ukiqme méq peh morá ké tahnsa míageheéna omaq itaráire. Minayabe ite iru ukiqme mía míairo. Manikánsabe ahriahri iwíáh iwíáhue kaweróne átáhiro. ¹⁶Sísá Karáhéne ehweh itene irupipeq ambubu atawéq iwíáhue tagahro. Ite morání moránínue Sísane sánsá ahtebagehboq we kawerue teawíéq síwáhnororo. Ite igonkónirataq itene irupipeq Manikánsabe iwíáh iwíáhororo. Buk Songipéqté ígónkónkákák áróturapeqté ígónkónkákák Manikáne Awanka iwíáh atahna ígónkónkákák ígonkónéq itene irupipeq Manikánsabe iwíáh iwíáhororo.

¹⁷Sísá itene Wahnah míéh púaq moke miraira arámbéhrí kawerue miraéq moke irarira ehwéh kawerue irarero. Mirairataq Sísá itene

Wahnah áwirue Maniká Iteribonsabé kaweróne ateq wensabé iwíáh iwíáh atáhiro.

Poraga Sísa tagaríáh káriró ánínsabé irari ehwéhne.

¹⁸Ahrerono, iteruwehqstone ehweh kawerue íráhro. Minawé Maniká itene Wahnah awahbeh sansáne.

¹⁹Weho, itene ahreronsabé irutaboiroro. Íre áyátehreh sah subóro.

²⁰Animáríno, ite inoibone ehweh saiyoiyehboq kawerue íráhro. Minawé Maniká awahbeh sansáne.

²¹Sibowárého, itene animárínká itene ehwehnsabé abiahnsanue anetaníbo iwíáhiyehboq pehipi íre ehweh arítáhiro.

Wahnah kené ehweh kawerue íráhro i ehwéhne.

²²Mó kené arambehri keo, itene marakóipeqté wáhnáh kéné ehweh moke kawerue íráhro. Itene wahnah kegá ite kaweq arámbéhrí ánímári móe iwíáhigeheéq peh morá se miáhtáq tauntahunue arámbéhríéwé kaweq sansápo? Írakaumo. Maniká itene Wahnahnka tagaríéhnsabé wensabé áhreeq iwíáhue ahriahri kawerue arambehrioro.

²³Moke miraira arámbéhríwé tauntahunue arambehrioro. Íre peh morá wehukega wahnahnonsabé Manikánka moq wahnahni puaq kawerue arambehrioro. ²⁴Ite kiotaqme wahnáhmé Sísa Karáhé wíre. Itewe peh wene arambehriúna anímári múne. Wegá mókake kaweq naneq oga mé apéq náinkéhe. Minawé tagaríáhwe. ²⁵Manikánka ahbabáq ani kamah awinawire. Wegá moke wehuke peh morá sánsánéna tábúsoqme sainsuanawire.

4 ¹Wahnah keo, itene arambehri ke tábúsoqme wahnahnéq pehwehrue kawerarítáhiro. Iteitene Wahnah íopeq ména tagaríéhre. Minawé aiq írátíáhwe.

Itega págegeue púreréq kaweq sansánoro i ehwéhne.

²Púreré sansa túbáh agiyehboq ahriahri púreroro. Púrerirataq itene irupipeq taorahoiyehboq kawerue iwíáhue Manikánsabe iwíáh iwíáh atáhiro. ³Itensabéákák púreraitáhiro. Manikánka naho íre teiasa éhwéh amahnága íróge. Mó ke Sísa Karáhé éhweh korerinibog Manikánka mi ahtápéqté ónsá sinkehboq púreraintáhiro. Mi ehwéh teri terinuraunsabé suwahriarai kegá íné karábúsiipéq méintárowana míoge. ⁴Sísa éhweh tábúsoqme teri terime kaweq sansáne. Ínéga kawerue mirainkeheéq púreraintáhiro.

⁵Sísa íre tagaríáh kegá itene sánsá tagahnsabé kawerue iwíáhéq tabasiwe miáhro. Seba miéhrataq ahtebawe anímári méq Sísane sánsá kawerue sokigioro. ⁶Ehweh irarirataq iwíáhue tábúsoqme ehwéhnoro. Mó kegá itene ehwehnsabé kasenirataq iwíáhue tábúsoqme teriéro. Minayabe iahtebahro.

Poraga téhraníte Kórósia kebá eqmaqsoo ehwéhne.

⁷Ínéreq Tíkíkúsireqme Sísa itene Wahnahne arambehri moráráq miraurauye. Wega mi arámbéhrí kawerue mira aruqarurire. We áhnte niruní ání míre. Wega néne sánsá teinkéhe. ⁸Ite págege aitena mahta q miráúna sansá teinkeheéna eqmaraníe. ⁹Ónésímaga moq Sísame arambehri kawerue mira aruqarurire. We iruí ání ména iteruwahrah aní míre. Wereq Tíkíkúsireq iteba moráráq konaraq itega mahta q moke miráúna sansá sega teigéhe.

Poraga Kórósia suwahpeqte keyábé iroso i ehwéhne.

¹⁰Ínéreq karábúsiipéq míoya aní Árisátákiga itensabé iroso ire. Páhnábásane anahnowáné ani Máhkaga moq itensabé iroso ire. Menah ehweh teiátáunserah wega iteba kína q mehweh ateq kirabooro. ¹¹Mahtaqté ání Sísa we mó awíq Sásátaga moq itensabé iroso ire. Mi anímá rí Asiu anímá rí móe. Ínéga Manikánka wahnahnirabeqte árámbehrí mirauta q seba q inéreq arambehriowe. Segá anotahta q séhréh aintáhwe.

¹²Épárásiwe iteruwahrah aní ména Sísa Karáhéne arambehri mira aruqaruréna itensabé iroso ire. Wega ahriahri itensabé áhnteta q púreraitéhre. Itega Maniká awahbeh sánsá iahtebéq ambubu atawéq kawerue sehgiheéna púreraitéhre. ¹³Áráórísia suwahpeqte kéreq Íérápórísia suwahpeqte kéreq itereq séhréh aitanieéna wega págegeue arambehrire. Minawé tagarawéna teiúge.

¹⁴Árúkawé niruní sótéh áníne. Wereq Témásireqka itensabé iroso éye. ¹⁵Áráórísia suwahpeqte Sísa tagariáh kéreq Nímbareq wene nahtapeq momiwí aruqaruro kereqsabé iroso teriéro.

¹⁶Mah pahsí sáhnahwe parabarúéhra q Áráórísia suwahpeqte Sísa tagariáh kéga sáhnahigéhboq síero. Áráórísia suwahpeqte Sísa tagariáh ké síú pahsí kiwewe sáhnahwe tagahro.

¹⁷Áhkípúsansabé, Itene Wahnahnka oma q atárái arámbehrí kawerue miraué parabaruo teawéro.

¹⁸Íné Poraga amahnága inéne niyahnkaratáté mah anéhété éhwéh sehiranuge. Karábúsiipéq míónsábé ahre q matíáhro. Manikánka ite séhréh aitahráhire. Mirainkeheéna itensabé púreraitóge.